

**Uunga siunnersuut: Kommunini suliassaqarfiit aaqqissuuteqqinneqarnerata allannngortinneqarneranik Inatsisartut inatsisaat nr. xx, xx,xxx 2016-imeersoq**

(Qaasuitsup Kommunია marlunnut avinneqarnissaa).

(Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoq)

**Akissuteqaat**

(Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoq)

**Aappassaanneerreqarnera**

Inatsisissamut siunnersuut suliareneqarneranut atatillugu Inatsisinut Ataatsimiititaliaq sukumiisumik sulineranut Naalakkersuisut sinnerlugit qujassuteqarfigaara.

Inatsisinut Ataatsimiititaliap isumaliutissiissut tunniuppaa, tassanilu ataatsimiititaliami amerlanerussuteqartut, tassalu Siumumiit aamma Inuit Ataqaqatigiinniit isumaqarput Qaasuitsup Kommunია kommuninut marlunnut avinneqartariaqartoq, aningaasartuutaanerusussallu kommunit nutaat marluusut inuiaqatigiillu tamarmiusut akornanni assigiimmik avinneqartariaqartut. Tassalu Inatsisinut Ataatsimiititaliami amerlanerussuteqartut inatsisissatut siunnersuutip akuerineqarnissaa inassutigaat.

Tamatuma peqatigisaanik ataatsimiititaliap kaammattuutigaa, siunnersuutip pingajussaanneerreqannginnerani, Qaasuitsup Kommuniata marlunnut avinneqarnerani innuttaasut amerlassusaat aningaasaqarnerlu eqqarsaatigalugit, taakkununggalu akileraartarnermut tunngavissat ilanngullugit, sapinngisamik assigiimmik, innuttaasut maanna atugaannik ajorseriartitsinngitsumik avitsinissamut periarfissat suunersut Naalakkersuisut nassuiaateqassasut. Tassunga ilanngullugu aamma Ataatsimiititaliap kissaatigaa, kommuni 1) Qaanaap Kommunerisimasaanut, Upernaviup Kommunerisimasaanut, Uummannap Kommunerisimasaanut aamma 2) Qeqertarsuup Kommunerisimasaanut, Qasigiannnguit Kommunerisimasaanut Aasiaat Kommunerisimasaanut aamma Kangaatsiap Kommunerisimasaanut avinneqarpat naligiinnerusumik avitsinissaq anguneqarsinnaanersoq nassuiaasoqassasoq. Tamatuma saniatigut Ataatsimiititaliap isumaqatigiissup Naalakkersuisunut kaammattuutigaa, siunissami qanittumi kommunini iluarsasseqqinneq (kommuninik kattussineq) naliliiffigeqqullugu. Tassunga tunngatillugu ilisimatitsissutigineqarsinnaavoq, Naalakkersuisut Inatsisinut Ataatsimiititaliap kissaataanut akuersinissamut piareersimammata.

Inatsisinut Ataatsimiititaliap isumaliutissiissutaani aamma inatsisissatut siunnersuummut arlalinnik oqaaseqaateqartoqarpoq, taakkulu matumuuna akineqassapput.

Inatsisissatut siunnersuummi § 1 Qaasuitsup Kommuniata kommuninut nutaanut marlunnut avinneqarnissarpiaanut tunngasuvoq. Inatsisinut Ataatsimiititaliamit oqaatigineqarpoq, aalajangersagaq taanna inatsisinut, nalunaarutinut malittarisassanullu pioreersunut assigiinngitsunut uniuuttussaasoq. Tassunga tunngatillugu akissutigineqarsinnaavoq, kommunimik avitsinissap 1. januar 2018-imi piviusunngortinnagu aalajangersakkat taakku nutarterneqarnissaat siunnerfigineqarmat.

Kiisalu Inatsisinut Ataatsimiititaliaq inatsisissatut siunnersuummi § 11, imm. 2-mut, kommunini nutaani tamani qanoq ateqarnissap illoqarfiillu ilisarnaataasa qanoq ittuunissaata kissaatigineqarneranut tunngasumut oqaaseqaateqarpoq. Inatsisinut Ataatsimiititaliap oqaatigaa, ikaarsaarnermut ataatsimiititaliaq tassunga aalajangiinissaannut piffissarititaasoq 1. august 2017-imut killeqarmat, UKA2017-imut tunniussinissamut piffissarititaasoq nallertinnagu inatsisissatut siunnersuummik suliaqarnissaq ajornakusoorsinnaasoq. Tassunga tunngatillugu akissutigineqarsinnaavoq, ikaarsaarnermut ataatsimiititaliat aalajangiinissaat sioqqullugu ilaatigut piffissaq tusarniaaffiusoq naareersimasussaasoq. Taamaattumik UKA2017-imut tunniussinissamut piffissarititaasoq malinneqarsinnaavoq.

Aamma Inatsisinut Ataatsimiititaliaq inatsisissatut siunnersuummi § 16, imm. 2-mut, ikaarsaarnermut ataatsimiititaliat naatsorsuutaannik kukkunersiuinnermut tunngasumut oqaaseqaateqarpoq. Inatsisinut Ataatsimiititaliap oqaatigaa, ikaarsaarnermut ataatsimiititaliat naatsorsuutaasa kukkunersiuugassanngorlugit tunniunneqarnissaannut piffissarititaasoq, 1. juni 2018-imut killeqartoq siuartinneqartariaqartoq, naatsorsuutit inaarutaasut aatsaat 2018-imi septembarimi, tassalu ukiup naatsorsuiffiusup naaneraniit qaammatit qulingiluat qaangiunnerini piareersussanngussammata. Tassunga tunngatillugu akissutigineqarsinnaavoq, kommunit nutaat aallaqqaammut suliasarpasuaqartussaasut, taamaattumillu piffissarititaasoq naammaginantutut isumaqarfigineqartoq.

Inatsisissatut siunnersuummi § 19, imm. 3 naapertorlugu Naalackersuisut maannamut Qaasuitsup Kommunerisaani pigisanik nalilinnik akiitsunillu agguaanissamut maleruagassanik ersarinnerusunik aalajangersaasinnaapput, taakkunungalu isumaqatigiinnginnermi aaqqiinissamut tunngasut ilaatinneqarput. Kiisalu Aalajangersakkamut oqaaseqaammi allassimavoq, pigisanik nalilinnik akiitsunillu naammaginantumik agguaanissaq anguniarneqartariaqartoq, taamaalilluni kommunit nutaat arlaalluunniit aapparminut akigineqassanngimmata. Tamatumunnga atatillugu Inatsisinut Ataatsimiititaliaq allappoq, agguaanissap naammagintuunissaanut, tassungalu ilanngullugu eqqarsaatigisassat suut pingaartinneqarnissaannut suut tunngavigineqarnersut pillugu naammattumik nassuiaasoqarnissaa amigaatigalugu. Tassunga tunngatillugu akissutigineqarsinnaavoq, suliat ataatsimut naliliiffigalugit pigisat nalilit akiitsullu naleqquttumik assigiissillugit agguarneqarnissaat anguniarneqassasoq. Naammaginantumik naliliinissamut pisuni ataasiakkaani pissutsit atuuttut apeqqutaasassapput.

Kiisalu inatsisissatut siunnersuummi § 21-mi allassimavoq, suliasaqarfiup iluani allagaatit, Qaasuitsup Kommuniata aamma ikaarsaarnermut ataatsimiititaliat marluusut akornanni avitseqatigiiffiusussat, tamanut inatsisiliornermut inatsit sullissinermullu inatsit naapertorlugit allagaatinik takunnissinnaatitaanermut maleruagassanut ilaatinneqanngitsut. Aalajangersakkamut tassunga tunngatillugu Inatsisinut Ataatsimiititaliaq allappoq, suliasaqarfiup iluani allagaatit ilaatinneqannginnerinut, suliasaqarfiup iluani aalajangiiffigisassatut suliat illersorneqarnissaat siunertarineqartoq, aammalu siunertap taassuma oqartussaasut marluusut akornanni allagaatinik avitseqatigiinnissaq pineqartillugu atuutsinneqartarnissaanut ataatsimiititaliaq isumaqataanngitsaq. Tassunga tunngatillugu akissutigineqarsinnaavoq, ikaarsaarnermut ataatsimiititaliat marluusut 1. januar 2018-imi, kommunini marluusuni kommunalbestyrelsinngorunik aatsaat oqartussaasutut nammineerluinnartutut inissittussaasut. Kiisalu aalajangersakkat taamaattut aamma kommunini suliasaqarfiit aaqqissuuteqqinneqarnerat pillugu Inatsisartut inatsisaanni nr. 14-imi, 19. november 2007-imeersumi § 28 naapertorlugu 2009-mi kommunit kattunneqarnissaat sioqqullugu ikaarsaarnermut ataatsimiititalianut atuussimapput.

Naalackersuisut Inatsisinut Ataatsimiititaliap isumaliutissiissutaanut allanik oqaaseqaatissaqanngillat.

Taamatut oqaaseqarluta Naalackersuisuniit inatsisissatut siunnersuutip saqqummiunneqartup akuerineqarnissaa inassutigaarput